

Chin yurak so'zlari
2 - betda

Eng ko'p ertak aytgan bola
5 - betda

Ko'kdalaning yulduzlari
6 - betda

Yaxshi kitoblar bor!
8 - betda

TONG YULDUZI

Ona yurti — oltin beshigi

O'zbekiston Respublikasi bolalari va o'smirlari gazetasi
Gazeta 1929 yil 1 avgustdan chiqa boshlagan

2007 yil
9 - 15 aprel
N:15
(66608)

9 aprel —
Amir Temur
tug'ilgan kun



DUSHANBADAN

«ISTIQLOL» DEB NOMLANDI

Jizzax tumanidagi maktabgacha ta'lim muassasalarining soni bittaga ko'paydi. Zamonaviy mebellar va asbob-uskunalar bilan jihozlangan bolalar muassasasiga «Istiqlol» deb nom berildi.

DEHLIDAN KUSHXABAR

Qashqadaryo viloyatidagi Shahrisabz tasviriy va amaliy san'at litseyining 9- sinf o'quvchisi Amir Abdimo'minovning «O'zbek milliy kurashi» nomli asari Dehlidagi dunyo bolalari rasmlar ko'rgazmasining kumush medali bilan taqdirlandi.

Amirjondan o'rganing, ibrat oling va havas qiling.

QANCHA KO'CHAT EKILDI?

Farg'ona viloyatidagi Buvayda Pedagogika kolleji o'quvchilari «Navro'z» bog'ini yaratishdi. Kollej atrofini qamrab olgan uch gektarlik yoshlar bog'iga 2 ming tupdan ortiq mevali va manzarali ko'chatlar o'tqazildi.

YILNING ENG YAXSHI MAKTABLARI

Maktabingiz yilning eng yaxshi maktabi bo'lishiga harakat qiling va shoshiling. Bu yil esa Toshkent viloyati, Bekobod shahridagi 16-maktab jamoasi 1-, Toshkent shahri, Yunusobod tumanidagi 260-maktab 2-, Namangan shahri, Mingbuloq tumanidagi 13-maktab jamoasi 3-o'ringa munosib deb topildi.

DUSHANBAGACHA

1. Yetti yoshga to'lganimda, meni maktabga topshirishdi.
2. To'qqiz yoshga to'lganimda, ... barcha o'quvchilarga boshliq bo'lib oldim.
3. O'n ikki yoshga to'lganimda, bolalarcha o'yinlardan orlanadigan bo'ldim.
4. O'n to'rt yoshga to'lganimda, ... badxulq bolalar bilan do'stlashmaydigan bo'ldim.
5. O'n besh yoshga to'lganimda, zolim kimsalardan nafratlanadigan bo'ldim.
6. O'n olti yoshga to'ldim. Otam meni masjidga olib keldi va ota-bobolardan qolgan odat bo'yicha askarlarga boshchilik qilish huquqi shu kundan menga o'tishini e'lon qildi.
7. O'n to'qqizga to'lganimda, ... otam munajjmlardan taqdirim qanday bo'lishini aytib berishni so'radi. Ular meni dunyoda mislsiz qudratli hokim bo'lishimni aytdilar.

AMIR TEMUR BOBONGIZ HAQIDA NIMALARNI BILASIZ?

«Qudratimizga shak-shubhangiz
bo'lsa, biz qurdirgan binolarga boqing».
Amir TEMUR.

SOHIBQIRON YARATGAN BOG'LARNING ENG MASHHURLARI:

1. Bog'i Baland
2. Bog'i Behisht
3. Bog'i Davlatobod
4. Bog'i Dilkusho
5. Bog'i Jahonnamo
6. Bog'i Maydon
7. Bog'i Nav
8. Bog'i Chinor
9. Bog'i Shamol



1. Amir Temur bobongizning hukmronlik yillarida Samarqand dunyoning eng go'zal shahriga aylantirildi. U mamlakat poytaxti bo'ldi.

2. O'z shahri Kesh (Shahrisabz)ni obod qildi. Maktab va oliy o'quv yurtlari — madrasalar, Chorsu bozorlar qurirdi.

Mashhur Oqsaroy (1380-1404 y.) qasri bunyod etildi.

3. Nahr (kanal) va ariqlar qazdirib, Toshkent shahrining suv ta'minotini yaxshiladi.

Kaffol Shoshiy (Xastimom) va Zangiota qabrlari ustiga maqbaralar tiklattirdi.

4. Turkistonning mashhur shaharlaridan biri Yassida Xoja Ahmad Yassaviy qabri ustiga go'zal, ulkan maqbara qurirdi.

5. Ozarbayjonda Baylaqon va Darband shaharlarini qaytadan ta'mirlatdi.

Kitobni ko'p o'qigan bola dono va aqlli farzanddir.

* * *

Kitobsiz uy — mehsiz uy.

* * *

Kitob ustoz bilan barobar.

* * *

Kitob — bu kompas, seni adashtirmay manzilga yetkazadi.

* * *

Vatanni sevish tilda, so'zda emas, balki amalda bo'lishi kerak.

* * *

Insonda Vatan tuyg'usi qachon kuchli bo'ladi? Qachonki u ona tuproqdan yiroq bo'lganida, «O'zbekiston» so'zini eshitganida ko'zlaridan tirqirab yosh oqsa...

* * *

— Biror ertakda yomonlik yaxshilik ustidan g'alaba qozonganini o'qiganmisan?

— Yo'q.

— Unda nega yomonlik qilasan, noshukur?! — dedi nuroniy oqsoqol yovuzlik qilgan yigitga.

* * *

Ko'p til bilgan inson dunyoni zabt etadi, deyishadi. Rost gap. Qadimda Beruniy bobomiz eng mushkul hind tilini, yozuvini mustaqil o'rganib, «Hindiston» asarini yaratgan. Zamaxshariy bobomiz esa arab tili grammatikasini puxta ishlab chiqib, shu tilni mukammal darajaga yetkazgan.

Kim qancha tilni o'rganib, dunyoviy bilimlarga ega bo'lgan bo'lsa, shuncha ko'p e'tiborga, e'zozga, martabaga ega bo'ladi.

Najmiddin Kubro aytadilar:

«Eng yaxshi do'st — bilim».

* * *

Kitobga mehr qo'ygan odamda yomonlik yo'q. Uning qalbi toza, niyati pok, maqsadi ezgulik bilan yo'g'rilgan bo'ladi.

* * *

Ota-onasiga yaxshi kitob sovg'a qilgan farzand oqil va dono, mehribon va sadoqatli o'g'il-qizdir.

O'zbekona mulozamat — chin insoniy xislat. Unda kishi bilmas sir-sinoat, bebaho aql-farosat bor. Hayotda har kimning o'z o'rnini bor. U goh aqlda, goh tafakkurda, goh xushaxloqlikda, goh umrguzaronlikda mujassam.

Xalqimiz bilib aytadi: «Mehmonga borsang, yuqoriga chiqib o'tirib olma, pastda sendan ham ulug', aqlli odamlar o'tirganini unutma. Buyuk odam eng pastda o'tirsa ham ulug'ligicha qolaveradi».

* * *

Ilmsiz kishilar bilan hamsuhbat bo'lsang, so'zing so'ziga, fikring fikriga to'g'ri kelmaydi. Sen bog'dan gapirsang, u tog'dan gapiradi. O'zingni boshqa bir dunyodagidek his qilasan.

Shu xususda allomai zamon Farobiy aytganlar:

«Har kimki ilm hikmatini o'rganaman desa, uni yoshligidan boshlasin, salomatligi yaxshi bo'lishiga intilsin, axloq-odoblilik bo'lsin, so'zining uddasidan chiqsin, yomon ishlardan saqlansin, xiyonat va maktar-hiyaladan uzoq bo'lsin».

* * *

Birovdan o'ch olish — eng yomon odat. Bunday odamlardan yaxshilik kutish, omonlik tilash befoydali. Undaylarning jazosini Olloh beradi.

Amir Temur bobomiz aytganlaridek:

«Hech kimdan o'ch olish payida bo'lmadim. Tuzimni totib, menga yomonlik qilganlarni Parvardigori olamga topshirdim».

* * *

Tug'ilgan kunida farzandiga kitob sovg'a qilgan ota-ona eng ulug', eng ibratli va mo'tabar zotdir.


* * *

Kitob bitmas-tuganmas haqiqiy xazina. Uni o'qib tugata olmaysan. Har gal mutolaa qilgan sayin biror bir narsani kashf qilasan.

Jabbor RAZZOQOV.



CHIN YURAK



SO'ZLARI

VATAN — MUQADDAS GO'SHA!



Talabalik yillarimda paxta terimiga yuborishdi. O'sha paytda ota-onamizdan yiroqda, aziz uyimizning, qishlog'imizning qadri juda bilingan edi. O'shanda sog'inchlarim «Onajon» nomli she'rimga

to'kilgan edi. Uyga qaytgach, ularga she'rimni o'qib berganimda, onamning ko'zlari jiqqa yoshga to'lgandi. So'ngra taqdir taqozosi bilan yana uyimdan, qadrdon go'shamdan uzoqlashib, Moskva shahrida yashay boshladik. Oradan hech qancha vaqt o'tmay, yana uyimni sog'ina boshladim. Atrofimdagi mehrlar, ammo begona nigohlardan qochar, tug'ilib o'sgan joyimga intiqlikni sezardim. Vatan nima o'zi? Vatan o'sha, ko'zlari yoshli onajonim, tushlarimga kirib chiqadigan bolalik xotiralarim makoni — ota uyim...

Mana shular Vatanimning bir bo'lagi emasmi? Ha, Vatan faqat yashash joyi emas, qalbimizga hayot ishqini solib turgan muqaddas maskan hamdir.

*Zulayho XOLMURODOVA,
Qashqadaryo viloyati, Qarshi tumanidagi
25-umumiy o'rta ta'lim maktabining
ona tili va adabiyot fani o'qituvchisi.*

Odobnoma darsi

Bir go'zal va ko'rkam o'rmonda turli jonzorlar yashashar ekan. Bir o'rmonda yashashsa-da, sira ham birlari bilan chiqishishmas, arzimagan narsaga jang qilaverisharkan. Fasllar almashib, qish o'tib, bahor kelibdi. Boshqa o'lkalarda qish qattiq kelgani uchun katta muzliklar erib, o'rmonlarga suv toshibdi. U yerdagi hayvonlar shu o'rmonga qochib kelib, daraxtlarni ayovsiz sindirib, chiroyli joylarni payhon qilishibdi. Ba'zi jonivorlarning ovqatlarini, hatto uylarini ham zo'rlik bilan tortib olishibdi. Bundan aziyat chekkan boshqa jonzorlar qari ukkidan maslahat so'rashibdi:



DONO UKKI HAQIDA ERTAK

—Bunday hol takrorlanaversa, biz uysiz qolishimiz tayin,—deb gap boshlabdi bir bo'ri. —Bolalarimizning ham hayotlari xavf ostida. Tuni bilan qorovulchilik qilishimizga to'g'ri kelyapti.

Bo'ring bu gapiga barcha hayvonlar qo'shilibdi. Shunda ukki gap boshlabdi:

—Modomiki, siz birlashmas ekansiz, bu hol davom etaveradi. Agar hamjihat bo'lib, barchamiz birga kurashsak, bu yerlarga begona bo'lgan hayvonlarni quvib yuborishimiz aniq,—debdi.

Shu gapdan so'ng hamma hayvonlar birgalashib, chaqirilmagan mehmonlarga qarata jang boshlashibdi. Arilar havodan hujum qilishibdi, sher-u yo'lbarlar ham ayovsiz jangga kirishibdilar.

Orada qattiq jang bo'libdi. Oqibatda, begona hayvonlar o'rmondan quvilibdi. Shu voqeadan so'ng o'rmon jonivorlari dono ukkini o'zlariga boshliq qilib tayinlashibdi va nimaiki ishlari bo'lsa, u bilan maslahatlashadigan bo'lishibdi.

*Bashorat ABDURAIMOVA,
Qashqadaryo viloyati, Yakkabog'
tumani, 10-sinf o'quvchisi.*

BARNO NEGA UYALDI?

Barno bilan Ra'no opa-singil. Ra'no mehnatkash, saranjom-sarishta, pokiza qiz. Barno esa tamoman uning aksi. Doim qo'ldan ko'zgu tushmaydi, unga qarab o'ziga oro bergani-bergan. Ra'no yig'ishtirib qo'ygan uyni to'zitib, ivirsitib tashlaydi. Uning bu qiligidan ota-onasi ham ranjib turishadi. Bir kuni onasi:



—Barno, tur qizim, bugun uyga mehmonlar keladi, Ra'no opangga yordamlashib yuborgin,—deb tayinlab, o'zi ishga otlandi. Barno bu gapga parvo ham qilmay, ko'rpaga burkanib yotaverdi. Ra'no esa barvaqt turdi-yu, yumushlarini bitirib, maktabga ketdi. Barno o'rmondan turib qarasa, hovlida hech kim yo'q. Birdan qo'ng'iroq ustma-ust jiringladi. Shunda u onasining «bugun uyga mehmon keladi», degan gapini esladi. Yugurib borib eshikni ochsa, xolasi ekan.

—E, Barno qizim, o'tiribsanmi, hamma yumushni senga tashlab ketishibdi—yu bular-a,—dedi xolasi uni erkalab sochlaridan silarkan. —Qara, hammayoqni chinnidek qilib qo'yibsan-a...

Barno uyalib yerga qarab turdi. Garchi bu «rahmat»lar asli Ra'noga yog'ilayotgan bo'lsa-da, negadir Barno uyalayotgan edi.

Aziz tengdoshlar, aytingchi, Barno nega uyaldiykin-a?

*Ravshan O'KTAMOV,
Farg'ona viloyati, Beshariq tumanidagi
42-maktabning 6 -«A» sinf o'quvchisi.*

ONAM ALLASI

Alla aytay bolamga,
Bag'rimdagi lolamga,
Kunduz o'ynab yayragan —
Sho'xligi shalolamga.



Alla aytay bolamga,
Oqshom tushdi olamga,
Oy, yulduzlar nur sochar —
Borliq, bog'-u dalamga.

Alla aytay bolamga,
Tosh erisin nolamga,
Mehrim nurini sochay,
Sochlari — zar tolamga.
... Alla aytay bolamga!..



MUNISA QIZ

Munisa qiz jayrongina,
Asal, tili biyrongina,
Dilingizni yayratadi,
Ishchan, biram chaqqongina.
Nigohlari o'tli — otash,
Ayasiga mehri tutash,
Buvijonlar ko'zmunchog'i —
Otalarning ovunchog'i.
Nasli, azal malikalar,
Uy bekalar, oy bekalar,
Go'zallikning lolalari —
Ammalari, xolalari!..
...Tilagim shu, katta bo'lsin,
Qalbi chashma — nurga to'lsin,
Kokili zar, marjongina,
Munisa qiz, jayrongina!..

BAHOR

Bahor keldi dala qirlarga
Yashil gilam — seplarin yoyib.
Gulchechaklar iforlaridan —
Xasta dillar ketar sog'ayib.
Tabiat ham bo'lib orasta,
Majnunatollar soch yoyar asta,
Hammayoqda ko'klam quvonchi —
Ko'ngillarga bo'lar payvasta.
Maysalar bir-birin turtkilar,
Daraxtlarning shoxi bukilar.
Xudoyimning gavhari yomg'ir,
Zamin quchog'iga to'kilar.
Bahor keldi dala-bog'larga,
Yashil gilam seplarin yoyib...

*Fotima JABBOROVA,
Andijon viloyati, Qo'rg'ontepa
tumanidagi 25-o'rta maktabning
9-sinf o'quvchisi.*

YAXSHILIK

(Qatra)

Yaxshilik shunday bir xilqatki, u dunyoga keliboq, ortidan yana bir go'zal ezguliklarni yetaklab keladi. Dunyodan o'tayotib, umr bo'yi topgan boylig-u bisotimiz yaxshilik ekanligini doim ham anglayvermaymiz.

Yaxshilik shunday tuhfaki, u hech bir ta'masiz qilinadi. Insonlar o'rtasidagi mehr-oqibat rishtalarining mustahkam bo'lmoqligi oramizdagi savobtalab, ezgu niyatli kishilarning yaxshi amallariga naqadar bog'liq. Bir ko'ngli buzuqning dilini shod aylamoqlik baxtiga muayassarlar ko'paysin oramizda!

Yaxshilikni odat qilganlarning ezguliklari yoritib tursin jahonni... Ana shu o'ftobning barhayotligi uchun dunyo yaxshiliklar bilan mazmundordir. Yaxshilikning umri davomli, xayrli bo'lsin!

*Baxtiyor SOATOV,
Toshkent viloyati, Parkent tumanidagi
1-o'rta maktabning boshlang'ich sinf o'qituvchisi.*

MEHR QANDAY YARALADI?

—Oyijon, mehr qanday yaraladi,—so'radi bola onasidan.

—Sening shirin tabassumingdan—da,—dedi onasi uning peshonasidan o'pib. —Ulg'aygach, odamlardan mehringni, e'tiboringni ayamang, ularga yordam qo'lini cho'zsang, mana shundan mehr yaraladi. Odamlar seni hurmat qiladilar, senga mehr qo'yadilar.

—Do'stlik-chi, u qanday bo'ladi?

—Do'stlikmi? U xuddi porlab turgan quyoshga o'xshaydi. Chunki quyosh yer yuzini bab-baravar isitadi. Chinakam do'st seni yaxshi-yomon kunlaringda yoningda bo'ladi. Sen do'stingga, u senga ishonib, birovlariga ayta olmagan sirlarini aytadi. Agar do'stingga sodiq bo'lsang, sirlarini hech kimga aytmasan. Bu orqali do'stingga sadoqatningni bildirasan.



*Kamola ERGASH qizi,
Toshkent viloyati,
Toshkent tumani.*

«OROM»CHILAR G'OLIB

Bolalarni dunyoni qadrlashga, do'st-birodarlikka o'rgatish har jihatdan muhim. Shu ma'noda yaqinda Toshkent shahrining Uchtepa tumanidagi 228-umumiy ta'lim maktabida tuman maktablari orasida bolalar badiiy kechasi o'tkazildi. Unda rus shoiri K.I.Chukovskiy xotirasiga bag'ishlangan ko'rik-tanlov bo'lib, unda 1-o'rinni «Orom» bog'cha-maktabi, 2-o'rinni 116-o'rta maktab, 3-o'rinni 295- va 14-o'rta maktablari olishga sazovor bo'lishdi.

Ushbu ko'rik-tanlovda ishtirok etgan maktabimiz o'quvchilari tomonidan sahnalashtirilgan «Muxa-sokotuxa», «Chudo-derevo», «Aybolit», «Barmaley» va boshqa sahna ko'rinishlari yig'ilganlarga manzur bo'ldi.

Adolat KARIMOVA,
Toshkent shahar, Uchtepa tumanidagi
295-maktabning rus tili va adabiyot o'qituvchisi.

YOSH KIMYOGAR TO'GARAGI A'ZOLARI

Maktabimizda kimyo fani oyligiga bag'ishlangan tadbir o'tkazildi. Unda tuman maktablarining kimyo fani o'qituvchilari, bu fanga qiziquvchi o'quvchilar ochiq darslarni kuzatib, fikr va mulohazalarini bildirdilar.

Ayniqsa, tadbirda «Yosh kimyogar» to'garagi a'zolari I.Vohidov, M.Ahmedov, A.Isoqovlar turli xildagi kimyoviy mashg'ulotlar orqali mo'jiza ko'rsatganlarida ushbu fanga qiziqish yana-da ortdi.

M.JO'RAYEVA,
Andijon viloyati, Ulug'nor tumanidagi
16- ixtisoslashtirilgan maktab-internatining
yoshlar yetakchisi.

2007 yil - Ijtimoiy himoya yili



HOZIRDAN O'RGANAYLIK

Mening qo'shni mahallada yashaydigan 80 yoshdan oshgan nuroniy buvijonim bor. Ularning hollaridan tez-tez xabar olib turaman. Joylarini rostlayman, uylarini tozalayman, ba'zida ovqatlarini ham qilib beraman. Yaqinda buvijonimning yurishlariga qiynalmasin deb mevali daraxtdan aso yasab berdim. Ular ham ishlarimdan rosa xursand bo'ldilar va yonlariga olib, duo qildilar. Ularning duolaridan so'ng ancha yengil tortdim, qalbm quvonchga to'ldi. Nazarimda, buvijonim kundan kunga yosharib ketayotgandek...

Bu yil davlatimiz tomonidan aholining ijtimoiy himoyaga muhtoj qatlamiga qo'ldan kelganча yordam berish uchun xayriyalar amalga oshirilmoqda. Biz o'quvchilar ham bu an'anadan chetda qolmagan holda kattalarga yordam berib, yilimiz talablarini amalga oshishida ko'makdosh bo'lishimiz lozim.

Mahzuna SOLIYEVA,
Farg'ona viloyati, Beshariq tumanidagi 33-maktabning 9-«E» sinf o'quvchisi.

Bolajonlar! Yaxshi bilasizki, har yili san'at bog'iga endigina qadam qo'yayotgan tengdoshlaringiz orasida «San'at g'unchalari» ko'rik-tanlovi o'tkaziladi.

Bu yil ham viloyat bosqichlarida g'oliblikni qo'lga kiritgan 70 nafardan ziyod yosh iqtidorli musiqachilar o'zaro bellashdilar. Ular orasidan Granpriga Nodira Dadamammedova sazovor bo'ldi.

G'olib va sovrindorlarga «Sog'lom avlod uchun» hukumatga qarashli bo'lmagan xayriya jamg'armasi tomonidan diplom va esdalik sovg'alari topshirildi.

Sayyora JO'RAYEVA.

SAN'ATIMIZ G'UNCHALARI



G'ALABALAR JARANGI



Aziz bolajonlar, sportning sambo turi haqida eshitgan bo'lsangiz kerak-a? Sambo so'zi rus tilidan tarjima qilinganda, «Qurolsiz o'zini himoya qilish» degan ma'noni bildiradi. Yurtimizda bu sport turi jadal rivojlanib bormoqda. Hatto sambo bo'yicha jahonga tanilgan chempionlarimiz ham talaygina.

Yaqinda «Jar» sport sog'lomlashtirish majmuida sambo bo'yicha 1991-1993 yillarda tug'ilgan qizlar o'rtasida Respublika turniri bo'lib o'tdi. O'zbekiston Sambo federatsiyasi tomonidan ilk bor tashkil etilgan bu musobaqada Toshkent shahri va viloyatlarimizdan tashrif buyurgan 120 nafar sambochi qizlar 12 vazn toifasida gilamga chiqishdi. Bularning orasida Xorazm viloyatidan kelgan Munisa Boqiyeva ham bor. Boshqa raqobatchilarga qaraganda, dadil harakat qilgan bu qiz bilan musobaqadan so'ng suhbatlashdik:

—Men Xorazm viloyatidagi Madaniyat va sport ishlari boshqarmasiga qarashli 1-Bolalar va o'smirlar sport maktabining a'zosiman. Maktabimizdan sambo bo'yicha Osiyo chempioni Nilufar Davletova, O'zbekiston chempionatida bir necha bor g'olib bo'lgan Nodira Alibekova singari kuchli sportchilar yetishib chiqqan. Ularga havas qilganimdan shu sport turini tanlaganman. Tajribali sportchi Arslon Yo'ldoshev 1999 yildan buyon menga murabbiylik qiladilar. Shu yilning fevral oyida 1989-1991 yilda tug'ilgan qizlar o'rtasida o'tgan O'zbekiston birinchiligida 40 kg. vazn toifasida II o'rinni olgan edim.

Endi may oyida qizlar o'rtasida bo'lib o'tadigan navbatdagi musobaqaga qizg'in hozirlik ko'rayapman.

Musobaqachi qizlarni diqqat bilan tomosha qilib o'tirgan qizchani ham suhbatga tortdik:

—Siz ham sambochimisiz?

—Yo'q, lekin oilamiz bilan sportga oshnomiz. Har kuni erta turib, badantarbiya qilamiz. Akam Ulug'bek taekvando mashg'ulotlariga qatnaydi. Dadam meni sambo klubiga bermoqchilar. Bugungi musobaqani kuzatib, shunga amin bo'ldimki, bu sport bilan shug'ullanish uchun ham iroda va kuch talab qilinarkan. Menga sambochi

qizlarning ochko to'plashi juda qiziq tuyuldi. Ertagayoq sambo to'garagining haqiqiy a'zosiga aylanib, dadamning niyatlarini amalga oshirmoqchiman.

—Musobaqadan olgan taassurotlaringiz qanday?

—Gilamda jajji-jajji qizaloqlarning harakati meni lol qoldirdi. G'olib qizlarning diplom va esdalik sovg'alari bilan taqdiranishlarini ko'rib, ko'zim quvnadi va men ham ular singari bo'laman, deb dilimga tugib qo'ydim.

Bu musobaqada g'alabaga erishgan sportchilar sentabr oyida o'tkaziladigan Yevroosiyo ittifoqi o'yinlarida yurtimiz sha'nini himoya qiladi.

Ma'mura MADRAHIMOVA.

ENG KO'P ERTAK

Aziz bolajonlar, dunyoda g'aroyib voqealarning bo'lib turishi barchamizga ma'lum. Ana shunday hayratlanarli voqea Toshkent viloyatining Qibray tumanida yashovchi Jo'rayevlar oilasida yuz berdi. 6 yoshli Odilbek juda ko'p ertaklarni yoddan bilishi bilan ota-onasini lol qoldirdi.

Bir kuni kechki payt Orifbek bilan Odilbek ota-onalarining oldilariga kelib, «Biz bir o'yin o'ynaymiz, g'olibni esa sizlar aniqlab, sovg'a berasizlar», deyishibdi. Shoshilib qolgan ota-ona «Buyog'i qiziq bo'ldi-ku, yaxshi, faqat sovg'ani ertaga olasizlar», debdi. Jajji

«Yo'q, uyga kiraylik, senga ko'p ertaklar aytib beraman», derdilar. Keyin akam bilan kim ko'p ertak aytish o'ynadik. Men ularning hamma ertaklarini yodlab olardim. Akam esa, «Eh, yana ko'p ertak o'rganishim kerak. Buning uchun dadam bilan oyimdan ertak kitob olib berishlarini so'rashim lozim», dedilar. So'ngra ikkalamiz kelishib, sizlarga kim ko'p ertak aytib bersa, ertak kitob olib berishlaringizni so'rashga



AYTGAN BOLA

Odilbek «Dadajon, yutganga katta ertak kitob olib berasiz-a?», deya ertak aytishni boshlab yuboribdi. Xullas, bir soat-u yetti daqiqa tinmay ertak aytayotgan ukasining charchab qolganini sezgan Orifbek, «Bo'ldi, men yutqazdim», deya ertak aytishni to'xtatibdi. Bir-biriga ulanib borgan ertaklarni eshitgan ota-onaning esa quvonchlarini ichiga sig'mabdi.

Onasi: «O'g'lim, siz bu ertaklarni qayerdan bilasiz?» -deb so'rabdi.

«Akam har kuni bog'chadan olganlaridan keyin, «Birpas ko'chada o'ynab tursam maylimi?» deganimda,

kelishib oldik.

«Obbo mug'ombirlar-ey...»

Onasi farzandlari bo'sh vaqtlarini behuda o'tkazmaganligidan, hech kimning xayoliga kelmagan ibratli ish bilan mashg'ul bo'lganliklaridan juda-juda suyunibdi.

Odiljon esa ko'pgina ertak kitoblari sohibiga aylanibdi.

Ha, aziz bolajonlar, axir biz Amur Temur, Alisher Navoiy, Bobur, Beruniylarning naslimiz-ku. Xohish bo'lsa bas, hammasini eplaymiz.

Siz ham bir urinib ko'rsangiz, Odiljon singari bunday sovg'alarning sohibiga aylanishingizga ishonamiz.

Mohigul SUVONOVA.

«OLTIN TOJ» G'OLIBI



Men bir yil avval «Mening orzuim» nomli insho yozib, unga o'zim haqidagi ma'lumotlarni rasmim bilan jo'natgan edim. Biroz vaqt o'tib, telefon orqali mening ushbu ko'rsatuvda ishtirok etishim mumkinligi haqida xabar berishdi. Men bo'sh vaqtlarimda «Bulbulcha» ashula va raqs dastasiga qatnayman. Badiiy rahbarimiz O'zbekistonda xizmat ko'rsatgan artist, professor Shermet Yormatovdan qo'shiq kuylashning qonun-qoidalarini, Gulbahor

Mansurovadan esa sahnada o'zini tutish san'atini o'rganyapman.

«Oltin toj» ko'rsatuvi menga juda yoqdi.

Chunki bu teleo'yin yana ham ko'proq


bilim olishga undarkan. Bu g'alabamni Odinaxon oyijonim, Tohirjon dadajonim va akajonim Ravshanlarga atayman. Men oilamiz

yuzini yorug' qiladigan oqila farzand bo'lishga harakat qilaman.

Muslima IBROHIMOVA,

Toshkent shahri, Mirobod tumanidagi 154-maktabning 4-«A» sinf o'quvchisi.

Ochil dasturxon



Aziz o'quvchi! Salat yoki pishiriq tayyorlash qizlarning ishi deb o'ylashingiz mumkin. Yo'q, aksincha, salatlarni yigitlarimiz ham tayyorlashsa, ayniqsa, bayramlar arafasida maqsadga muvofiq bo'lardi.

Hurmatli yigitlar! Agar siz onangiz ishdan qaytguncha salat yoki biror ovqat tayyorlab qo'ysangiz, ularni xursand qilasiz, deb o'ylayman. Tavsiya qilayotgan salatlari-miz esa juda oson va tez tayyorlanadi.

BAHOR SALATI

Kerakli masalliqlar: 2 bog' ukrop, 2 dona bodring, 1 osh qoshiq o'simlik yog'i, 1 dona piyoz, 2ta tuxum.

Tayyorlanishi: Bodringni yuvib, to'rtburchak shaklida, ukrop va piyozni kattaroq qilib to'g'rang. Tuxumni tuzli suvda qaynatib olib, sovugach, uni ham shu shaklda to'g'rab, so'ng hammasini aralashtirib, ustidan o'simlik yog'i qo'shing.

Ana, siz uchun osongina salat tayyor!

NONJARKOP

Kerakli masalliqlar: 2 dona piyoz, 1 stakan o'simlik yog'i, 4 dona kartoshka, 1 dona to'g'rab qotirilgan non, 2-3 dona pomidor, ko'kat, tuz, 250 gramm go'sht.

Tayyorlanishi: Qizigan yog'ga piyoz solib qizartiring, so'ng to'g'ralgan go'sht soling. Piyoz va go'sht qovurilayotgan paytda pomidorni yoki tomat pastasi solib, ustidan kartoshkani tashlang.

Kartoshka qizargach, ziravorlar, tuz qo'shib, yana bir bor qozonda aylantirib oling. 1,5 kosa suv soling va 15-20 daqiqa past olovda qaynating. So'ng to'g'ralgan nonni qozonga soling va tuzini tatib ko'ring. Hammasini 1-2 marotaba aralashtirib, 10 daqiqaga dimlang. Pishgach, laganga suzing va ustini ko'katlar bilan bezang.

Yoqimli ishtaha!

NARGIZA tayyorladi.

Yelim shishadagi qatqini ichib bo'ldik. Buloq suviga nonimizni bo'ktirib yeb, birpas sholchaga cho'zildik. Ko'zim ilinibdi, irg'ib turdim. Mundoq qarasam, qo'y-echkilar ko'rinmaydi. Tayog'imni olib yugurdim. O'tlab bir adirga tushib ketgan ekan, qaytarib keldim. «Endi uyga qaytamiz-a, jo'ra», dedim. Begzod narsalarni xurjunga joylab, eshakni olib keldi. Men egarladim. Keyin serkavoyga, qani, uyga boshla qavmlaringni, deb hazillashdim. Serka qo'ng'irog'ini jiringlatib, Ko'kdala tomon yurdi. Qo'y-echkilar unga ergashdi. Yo'lga tushdik.

G'ira-shira qorong'ida uyga kirib keldik. Qo'ylarimni qo'raga qamadim. Endi bir tugallab qo'yay, deb sanadim. Qarasam, oq echkimiz yo'q. Bobomga aytdim.

—Moling halol, topiladi, bolam, - dedi bobom, —bo'riga yem bo'lmasa bo'ldi. O'zi uloqligida ham shayton edi. Sanqib ketib qolaverardi. Kirib, tomoqlaringni ichinglar.

Baribir yeganim ichimga tushmadi. Oq echkimiz sersut edi, kuniga ikki kosa sut berardi. Ishqilib, Qashqarning og'ziga ilinmagan bo'lsin-da.

4.SINIQC HIGA BORGANIMIZ

Yana uch-to'rt kun qo'ylarimni Archalikda boqib yurdik. Absalom aka tezroq no'xatini o'rib olsaydi, uydanozozqlashib ketmasdik, deb umid qilaman. Keyin oq echkimizni o'ylayman, haligacha topilmadi. Birov o'g'irladimikin? Unaqa desam, tog'da o'g'ri nima qiladi. Bu yoqlarga u qadamini o'ylab bosadi. Eshakday keladigan ne-ne itlarimiz borki...

Qarang, oq echkidan umidimizni uzganda, ko'zimiz yarq etdi. U topildi! Bir kuni azonlab qo'y-qo'zilarni

Mo'min ikkovimiz lo'killab ketdik. Aksiga olib, Shokirning otasi ikki ho'kizini sotgani shaharga tushib ketgan ekan. Borsak, Shokir ko'rpa-to'shak qilib yotibdi. Oyog'iga sho'rpaxta bog'langan. Enasi boshida peshonasini silab o'tiribdi.

—Keldingmi, jo'ra? — deb bazo'r jilmaydi Shokir. — Tuni bilan uxlamadim. Voy, to'pig'im yomon og'riyapti.

—Bobom aytdi, siniqchiga boramiz ekan, - dedim.

—Shunday qil, baraka topkur, - deb meni quvvatladi Shokirning enasi.

—Mo'min, bor eshagingni egarla! - dedim. U yugurgilab chiqib ketdi. Men Shokirni orqalab hovliga chiqdim. O'zim egarga mindim, Shokir orqamga mingashdi. Sekin-sekin yurib, Do'ngqishloqqa chiqib ketdik.

Biror soat yurdik. Siniqchi bobo uyda yo'q ekan, kutib o'tirdik. Bir vaqt yo'talib kirib keldi. Shokirning oyog'ini erinmay ko'rdi, mana bu yer og'riydimi, deb bir bosganda, Shokir «dod» deb yubordi.

—To'piq yorilibdi, ikki enlik, - dedi siniqchi, —bo'rsiq moyi bilan silab turish kerak. «Mo'miyo» topib ich, bolam. Tariqdayini sutga solib, tunda uxlashdan oldin ichasan. Hozircha taxtakachlab qo'yaman. Uch kun yechma, uqdingmi?

Shokir kallasini qimirlatdi. Izimizga qaytdik.

—Bo'rsiq moyi Ko'kdalada ham topilar, - dedi

qo'radan chiqarib dalaga hayday deb tursam, bizdan to'rt uy narida turadigan Sormon tog'a echkimizni yetaklab kelib qoldi.

—Bu sizlarniki emasmi, Elmurod? - deydi u.

—Bizniki! Bizniki! - deb echkimni burnidan quchoqladim. — Qayda yurgan ekan, Sormon tog'a?

—Eshqulning podasiga qo'shilib ketibdi. Oq echki Safar boboda bo'ladi, berib qo'ying, deb edi.

Rahmat aytib, echkingning bo'ynidan Sormon tog'aning belro'molini yechib berdim. Uning ustiga bobom chiqib qolib, Eshqul akani duo qildi.

—Ana, halol topilgan mol harom o'lmaydi, bir kuni topiladi, - dedi bobom. Shuncha kun ichimni achitgani uchun echkingning sag'risiga bir qamchi urdim. U «ma-a!» deb qo'raga qarab chopdi.

Qo'y-echkilarni og'ilxonaning sartiga chiqarib endi yo'lga tushmoqchi bo'lib turgandik, o'pkasini qo'ltiqib Shokir og'aynimning ukasi Mo'min kelib qoldi.

—Shokir akam oyog'ini sindirib qo'ydi, - dedi u hansirab.

—Obbo-o! Muncha it quvgan devonaday halloslamsang?! Qachon sindirdi? Nega sindiradi?

—Bilmasam. Soyda baliq tutayotgan ekan, yaltiroq bir toshga toyib ketibdi.

Kechadan beri «voy-voy»lab uyda yotibdi. Shunga... Sizni chaqirib kel, dedi.

Bobom Sormon tog'a bilan gaplashib turuvdi, Mo'minning gapini eshitib, dedi:

—O'rtog'ingni siniqchiga olib bor, ungacha qo'ylaringni biz qarab turamiz. Uyini bilasanmi?

—Do'ngqishloqdagi cho'tir siniqchimi? Bilaman. Bultur otam bilan bir borgan edim.

1

Shokir, - biroq «mo'miyo»ni qaydan topamiz? U otligga ham yo'q matox emish.

—Men topaman, og'ayni, - deb yubordim tavakkaliga.

—Qayerdan topasan? Tanishing bormi?

—Topaman-da, qo'yaber, - dedim mujmellanib.

Shokir do'stimni enasiga topshirib, podani izlab ketdim. Bobom, Begzod, Dilmurod uchchovi olislab ketishmabdi.

Archalikning yo'lida, ikki qirning orasida yurishgan ekan.

—Bobo, endi siz ketavering, o'zimiz egalik qilamiz bu yog'iga, - desam, bobom ko'n-madi.

—Uyda yonboshlab yotabersa, odam tanbal bo'lib qoladi. Yonlaringda yuray, biroz oyog'imning chigili yozilsin, bolam.

Kun tikkaga kelib, tushlik ham bo'ldi. Bir do'lananing soyasiga sholcha to'shab, joy qildik. Xurjundagi yemishlarni dasturxonga to'kdik.

Non, go'sht, qurt, qatiq, suzma... Toza havo ishtahani ochadi-da, Begzod bilan Dilmurod uchchalamiz birdan tomoqqa yopishdik. Begzod suzma yalab turib, so'radi:

—Bobo, ho'v anovi tog'ni nega Tovkeminchak deyishadi? Elmuroddan so'rasam, bilmadi.

—Ha, bizga ham aytib bering, bobo! - dedi Dilmurod. Bobom shoshmay bir piyola qo'y-qatqini shimirdi. Soqolmo'ylovini belbog'i bilan artib, gap boshladi.

Davomi. Boshi o'tgan sonlarda.

«O'zbek xalq ertaklari» kitobidan

Birdan shovqin-suron ko'tarilibdi. Tong Guli Rustamga:

—Ajdard tepaga yaqinlashibdi, - deb behush bo'lib yiqilibdi. Rustam qarasa, qop-qora, bahaybat ajdar bola bilan qo'y tomon o'rmalab kelayotganmish. Ajdarni sezgan qo'y betoqatlanib qochmoqchi bo'libdi. Bola dodlab yig'lay boshlabdi. Rustam tepaga qarab yuguribdi. Ajdar bola bilan qo'yni yeyish uchun avray boshlabdi. Qo'y tipirlashdan to'xtabdi. Bola mudray boshlabdi. Ajdar «yem»ini domiga tortayotganda qo'qqisdan tushgan kuchli zarba ajdarni gangitibdi. U o'zini o'nlab olish uchun soy tomon burilmoqchi bo'lganida, Rustam ikkinchi marta shamshir solib ajdarning boshini uzib tashlabdi. Xalq bu

QUYOSH YERINING PAHLAVONI

mo'jizani ko'rib, tepaga qarab chopibdi. Motam bayramga aylanib ketibdi.

Yig'in ichidan oq soqolli, baland bo'lyi bir kishi Rustamning oldiga kelib, sevinch yoshlarini to'kib:

—Bizlarni ofatdan qutqargan ey, pahlavon, kimsan? - debdi.

Tong Guli hushiga kelib qarasa, hammayoqda shodlikmish.

Rustamdan savol so'rab turgan odamning ko'zi Tong Guliga tushibdi.

—Tong Guli, hayotmisan? Seni zulmatdan kim qutqardi? - deb bag'riga bosib yig'labdi.

—Sizlarni ofatdan kim qutqargan bo'lsa, meni ham zulmatdan o'sha qutqardi. «Bukri dev»ni o'ldirgan, odamxo'r ajdarni chopib tashlagan, sizlarni ofatdan qutqargan, o'zlaringiz dostonlar to'qib yurgan Quyosh yerining pahlavoni Rustam o'tinchi shu bo'ladi, - debdi. Xalq Rustamni izzat-ikrom bilan shaharga boshlab boribdi.

Rustam do'stlari va otasini o'ylar ekan. Kunlardan bir kun Rustam Tong Gulining bobosi oldiga kelib, boshidan kechirganlarini aytib beribdi. «Otamni, do'stlarimni sog'indim», deb oh uribdi.

—Ey, pahlavon, dunyo yaratilganidan beri hech bir odam Quyosh yeriga chiqqan emas. Lekin bobolarimiz aytgan ertaklarga qaraganda, shu shaharning chap tomonida «Qirq tog'» degan baland tog' bor. Shuning tepasida Quyosh yeriga chiqish uchun yo'l bor emish. Lekin uni hech kim ko'rgan emas. U tog'ning tepasiga chiqaman, deb necha ming odamlar halok bo'lganlar. Yo'llar xavfli. Vahshiy hayvonlar ko'p. Yana u tog' qirq bo'g'in bo'lib, har bo'g'inning balandligi yuz gazli silliq toshdan iborat. Kel, pahlavonim, sen bu niyatingdan qayt. Bizning pahlavonimiz va sarkardamiz bo'l. Biz sendan ajralishni istamaymiz, - debdi.

Davomi keyingi sonda.

Sarlavhani o'qib, qaysi maskan ekan u, deb o'ylashingiz tabiiy. Chunki bu kabi joylarni o'zingiz ham ko'rib, bilib yurgan bo'lsangiz kerak. Biz hikoya qiladigan go'sha esa poytaxtimizda joylashgan bo'lib, Toshkent Davlat Sharqshunoslik instituti qoshidagi Sobir Rahimov akademik litseyi deb nomlanadi.

Akademik litsey haqida gap boshlashdan avval, u yerda bilim olayotgan sho'x va a'lochi talabalar haqida ikki og'iz ma'lumot beramiz. Avvaliga ko'zimizga to'polonchi bo'lib ko'ringan uch o'rtoq suhbatlashganimizdan so'ng a'lochi ekanliklarini isbotlashdi.



OILAMIZDA BIRGINA MEN...


– Men Farhod Abdurasulovman. O'zimdanda oldin ustozlarim haqida ma'lumot bermoqchiman. Barcha ustozlarimiz bizga birdek munosabatda bo'ladilar. Bilimimizni haqqoniy baholaydilar. Ularga Yorqin aka Shukurov, Madina opa Sharopova, Izzatilla aka Rahimov

kabi ustozlarimiz misol bo'la oladilar. Litseyimizdagi talabalar 3-bosqichda yapon, urdu, hind va turk tillarida bemaolol gaplasha oladilar.

O'zim arab tiliga qiziqaman. Lekin oilamizda sharq tiliga qiziqadiganlar yo'q. Kelgusida tarjimon bo'lmoqchiman. Sharq davlatlariga borish mening katta orzularimdan biri.

UL MASKANDA SHARQONA ODOB, ILM-U ZIYO, BILIM BEHISOB...

LIVIYADA TUG'ILGANMAN



–Mening ismim Nabil, familiyam Irisov. Nabil – arabcha so'zdan olingan bo'lib, oliyjanob degan ma'noni anglatadi. Men Liviyada tug'ilganman. 3 yoshimda Toshkentga kelganmiz. Oilamizda akam ikkimizning sharq tillariga bo'lgan qiziqishimiz bo'lakcha. 10 yoshimda ota-onam bilan birgalikda Misrga borganmiz. Ana o'shanda Misr ehromlarini ko'rib, hayratga tushganman. U yerdagi aholining so'zlashishi meni o'ziga rom etgan. Shuning uchun ham arab tilini o'rganishga ahd qilganman. Hozir shu litseyning 1-bosqich talabasiman. Hamma fanlarni yaxshi o'zlashtirib, faqat a'lo baholarga o'qishga harakat qilyapman.

Nabilning yonida turgan ikkinchi do'stini suhbatga chorladik:

SINF KONSULI

–Ismim Jasurbek, familiyam Aymatov. Jasur – arab tilida qo'rqmas, botir degan ma'noni anglatadi. Men Surxondaryoda tug'ilganman. Sharq tillariga qiziqqanim uchun hozir TDSHI akademik litseyining 1-bosqich arab guruhi talabasiman. Sinfda meni sinf konsuli qilib saylashgan. Litseyi a'lo baholarga bitirib, Sharqshunoslik institutiga kirish niyatim bor. Institutni tamomlagach, Arabistonga borib bilimlarimni mustahkamlab kelaman. Olgan bilimlarim asosida keyinchalik O'zbekistonni rivojlantirishga hissamni qo'shmoqchiman. Men O'zbekistonda tug'ilganimdan faxrlanaman.



GAPLASHISHNI XOHLAMADI

Farhod va Nabilning do'sti Nosir Hikmatov negadir o'zi haqida gapirishni xohlamadi. Sababini so'rasak: «Men unchalik a'lochi emasman, ustozlarimdan uyalaman», deb qo'yaqoldi. Harchand urinmaylik, Nosir o'zini olib qochaverdi. Biz esa nafaqat a'lochilar bilan, balki Nosirga o'xshagan mard, o'zini kamchiliklarini yashirmay ayta oladigan, qolaversa, sho'xligidan ustozlari oldida uyaladigan talabalar haqida ham yozmoqchi edik. Lekin, nailoj...

Talabalar suhbatini olganimizdan so'ng navbatni litseyning Ma'naviyat va ma'rifat ishlari bo'yicha direktor o'rinbosari Nazokat Jo'rayevaga berdik:

BARCHASI LITSEY HAQIDA

–Toshkent Davlat Sharqshunoslik instituti qoshidagi Sobir Rahimov akademik litseyi 1999 yil avgust oyida O'zbekiston Respublikasi Vazirlar Mahkamasining «Akademik litseylar va kasb-hunar kollejlari tashkil etish va ularning faoliyatini boshqarish to'g'risida» 77-sonli qarori asosida tashkil etilgan. Akademik litseyda arab, fors, hind, urdu, xitoy, yapon, turk, ingliz tillari chuqur o'rgatiladi.

–Ta'lim asosan qaysi tillarda olib boriladi va uning o'ziga xos jihatlari haqida to'xtalsangiz?

–Ta'lim o'zbek va rus tillarida olib boriladi.

Akademik litseyda bugungi kunda 756 nafar talaba tahsil olmoqda. Litseyning o'ziga xos jihati shundaki, talabalarga ta'lim berishda ko'proq sharqona madaniyat va odob-axloqqa e'tibor qaratiladi. Yangi «Axborot-resurs markazi»ning tashkil etilishi talabalarining bo'sh vaqtlaridan unumli foydalanishlariga yangi imkoniyat yaratmoqda. Chunki kutubxona fondi sezilarli darajada boyidi, kompyuterlar «Internet» tarmog'iga ulandi.

LITSEY SHOIRI

Litseyning 1-bosqich talabasi Muhammad Sodiq Rahmonov bolaligidan she'riyatga qiziqar ekan. Mustaqilligimizning 15 yilligiga bag'ishlab o'tkazilgan «Eng ulug', eng aziz» Respublika ko'rik-tanlovida ishtirok etib, hay'atning rag'batlantiruvchi mukofoti va «Faxriy yorlig'i»ga sazovor bo'libdi.

Quyida Muhammad Sodiqning yangi she'rini o'qishingiz mumkin:

VATANIM

*O'ynab-kulib o'sganim –
Bog'-u gulzor, chamanim,
Ona yurt – jon-u tanim,
O'zbekiston maskanim,
Tengsiz go'zal Vatanim!*

*Ellar baxt-iqbolga yor,
Chunki erk topgan qaror!
Yuksalar har bir diyor...
Eng sevimli gulshanim –
Aziz, ulug' Vatanim!*



*Turli xalq do'stdek yashar,
Bizga hurlik yarashar.
Kundan kun gullab-yashnar –
Qiyosi yo'q chamanim –
Mehrnga kon Vatanim!*

tomonidan ta'lim sifatini ko'tarish maqsadida bir qancha uslubiy ishlar amalga oshirildi. Sharq tillarini takomillashtirish maqsadida, Sharqshunoslik instituti bilan hamkorlikda o'rganilayotgan mamlakatlar adabiyoti, tarixi va ma'naviyati to'g'risida 5 turdagi ma'ruza matnlari yaratilgan bo'lsa, ingliz tili kafedrasi ustozlari tomonidan «Gidlik ishi», «Tarjimonlik nazariyasi», «Maktabgacha ta'lim muassasalarida til o'rgatuvchi» kabi kasbga yo'naltiruvchi fan dasturlari va qo'llanmalari yaratildi.

–*Jamoat ishlarida ilg'or, yuqori natijalarga erishgan o'quvchi yoshlar litseyda ko'p bo'lsa kerak?*

–Albatta. O'quvchilarimizdan birgina Akmal Ismoilovni oladigan bo'lsak, u 2006 yil Qarag'anda shahrida bo'lib o'tgan xalqaro «Bolalar muammosi yosh jurnalistlar nigohida» seminarida 2-o'rin sohibi bo'ldi. Toshkentda o'tkazilgan «Dunyo – Yangi avlod nigohida» xalqaro yosh jurnalistlar festivalida qisqa daqiqali hujjatli filmlar yo'nalishida 1-o'rin va Granpri sovrindori deb e'lon qilindi.

–*2007-2008 o'quv yilida litseyga*

o'quvchilar qaysi yo'nalishlar bo'yicha qabul qilinadilar?

–Yangi o'quv yilida jami 300 o'quvchi o'qishga qabul qilinadi. Ulardan 60 nafari aniq fanlar bo'yicha, 240 nafari esa xorijiy yo'nalishlar bo'yicha saralab olinadi.

–*Bitiruvchilarga qaysi mutaxassislik bo'yicha diplomlar beriladi?*

–Akademik litseyi bitirgan talabalarga besh xil, ya'ni «Tarjimon», «Sayohat byurosi xodimi», «Ish yurituvchi», «EHM operatori», «Maktabgacha ta'lim muassasalarida til o'rgatuvchi» kabi mutaxassislik diplomlari beriladi.

Litseyi tark eta turib, yana bir bor ortga nazar tashladik. Beixtiyor u yerda tahsil olayotgan talabalarga havaş bilan qaradik. Agar barcha akademik litseylarda talabalar ana shunday zamonaviy texnologiyalar asosida ilm olayotgan bo'lsalar, kelajak avlodning Yurtboshimiz aytganlaridek, «Farzandlarimiz bizdan ko'ra kuchli, bilimli, dono va albatta baxtli bo'lishlari»ga shubha yo'q...

Gulyuz BAHODIR qizi.

«GID» BO'LISHNI ISTASANGIZ...

–*Litsey kafedralarida olib borilayotgan ishlar xususida nima deya olasiz?*

–Bugungi kunda litseyda talabalarining yo'nalishli bilim olishlari uchun 4 ta kafedra faoliyat ko'rsatmoqda. 2006 yilda kafedralarning malakali ustozlari

YAXSHI

Hozirgi kunda bolalar qanday kitoblarni o'qishayapti? O'quvchilarning kitob o'qishida nafaqat ustozlar-u ota-onalar, balki nashriyot xodimlari ham birdek jon kuydiradilar. G'afur G'ulom nomidagi Nashriyot matbaa ijodiy uyi bosh muharrir o'rinbosari Nazira opa JO'RAYEVA bilan shu to'g'rida suhbatlashdik:

Mutolaa

—Har yili 2,5 million nusxadagi, uch yuzdan ortiq nomdagi kitoblar, darsliklar, san'at albomlarini yetkazib berayapmiz. Nashriyotimizda taniqli adib va yozuvchilarning asarlari bilan bir qatorda bugungi kunda izlanib, ijod qilayotgan yoshlarimizning ham kitoblari nashr qilinadi.

—Bolalar uchun-chi?

—Bolalar uchun ham talaygina kitoblar nashr qilganmiz. Jumladan, A.Navoiyning «Lison-ut tayr», X.To'xtaboyevning «Besh bolali yigitcha», «O'zbek xalq ertaklari» to'plami, «Tohir va Zuhra» dostoni kabi kitoblarimiz bolajonlarimizga ataldi.

Bugungi kun bolasi juda zukko va aqlli. Bolalar uchun mo'ljallangan kitoblar dizayni, ixchamligi bilan boshqa kitoblardan farq qilishi lozim. Shuning uchun ham nashr

KITOBLAR

qilinayotgan kitoblarimizni rang-barang bo'lishiga, rasmlariga alohida e'tibor berilayapti. Ayniqsa, ko'p kitoblarimizning lotin alifbosida chop etilayotgani ham maqsadga muvofiqdir.

* * *

Bolajonlar, kishining boyligi bilimdir. Bilim esa kitoblardan olinadi. G'afur G'ulom nomidagi Nashriyot matbaa ijodiy uyi sizlar uchun quyidagi kitoblarni chop etdi:

1. G'.G'ulom «Yodgor». Qissa va hikoyalar.
2. H.G'ulom «Binafshani sog'indim, sen-chi?». Hikoyalar.
3. X.To'xtaboyev «Besh bolali yigitcha». Roman.
4. «Kalila va Dimna». Hind eposi.
5. «Tulkivoy». Ertak (O'zing bo'ya).
6. «O'zbek xalq ertaklari».
7. «Sofdil Mallavoy». Ertak.
8. «Yosh yuraklar yolqini». Yosh ijodkorlarning hikoyalar to'plami.
9. A.To'rayev «Hamtovoqning hiylasi».
10. Yo.Rahimova «Shirinni taniysizmi?».
11. Z.Diyor «Oq ayiqqa soz qayiq».
12. Sh.Rahmon


«O'zbekning qorako'z bolalari».

—Shu o'rinda, aziz kitobsevar bolalarni ortiqcha ovora qilmaslik uchun manzilimizni, telefon raqamlarimizni eslatib o'tsak:

NMIU manzili: 100129, Toshkent shahri, Navoiy ko'chasi, 30-uy. Telefon: 144-22-53, 144-11-19, 144-64-52.


Matbaa korxonasi manzili: 100128, Toshkent shahri, U.Yusupov ko'chasi, 86-uy.

BOR!



«VATANIMIZ DARYOLARI»

Aziz o'quvchilar! Vatanimiz hududidan oqib o'tuvchi o'n to'qqizta daryo nomini kataklarning eniga yo'nalishda yozib, bilimingizni sinab ko'ring.



TONG YULDUZI

BOSH MUHARRIR v.b:
To'lqin HAYITOV

Muassislar:
O'zbekiston matbuot va axborot agentligi,
O'zbekiston Respublikasi Xalq ta'limi vazirligi,
«KAMOLOT» Yoshlar ijtimoiy harakati,
«SOG'LOM AVLOD UCHUN» hukumatga qarashli bo'lmagan xalqaro xayriya jamg'armasi.

Dizayner va sahifalovchi:
Fazliddin SHOYODGOROV
Navbatchi:
Ozoda TURSUNBOYEVA

Gazeta O'zbekiston matbuot va axborot agentligida 0208-raqam bilan 2007 yil 2 fevralda ro'yxatdan o'tgan.

TAHRIR HAY'ATI:
Turobjon JO'RAYEV,
Dilbar ALIMJONOVA,
Qahramon QURANBOYEV,
Jabbor RAZZOQOV
(«O'zbekiston» NMIU bosh muharrir o'rinbosari),
Dilmurod RAHMATILLAYEV,
Dilshoda DADAJONOVA,
Feruz JALILOVA
(Bosh muharrir o'rinbosari),
Sobirjon SHARIPOV,
Ergashvoy SARIQOV.

Manzilmiz:
700129,
Toshkent shahri,
Navoiy ko'chasi, 30-uy.
Obuna indeksi: 198.
e-mail: tong1924@mail.ru
Tel: 144-27-25 144-63-08
Tel./ faks: (99871) 144-38-10

Rassomlar:
Nodira MIRZAYEVA,
Feruz MATYOQUBOV.

Noshir:
«O'zbekiston» nashriyot-matbaa ijodiy uyi.
Gazeta «O'zbekiston» nashriyot-matbaa ijodiy uyi kompyuter bo'limida terib sahifalandi va chop etildi. Gazeta haftaning dushanba kuni chiqadi. Hajmi A-3, 2 bosma taboq.
Adadi - 60567
Buyurtma N: J 3514